

四庫全書

集部

欽定四庫全書

樂府詩集卷八十八

宋 郭茂倩 輯

雜歌謠辭

謠辭

堯時康衢童謠

列子曰堯治天下五十年不知天下之治  
與不治億兆之願戴已與不願戴已顧問

左右外朝及在野皆不知也堯乃微服游  
於康衢聞童兒謠堯喜問曰誰教爾為此  
言童兒曰聞之大夫大夫曰古詩也堯還  
宮召舜因禪以天下舜不辭而受之

立我烝民莫匪爾極不識不知順帝之則

晉獻公時童謠

春秋左氏傳曰晉獻公伐虢圍下陽問於  
卜偃曰吾其濟乎偃以童謠對曰克之十

月丙子旦日在尾月在策鶉火中必是時  
也冬十二月丙子朔晉滅虢虢公醜奔京  
師漢書五行志曰周十二月夏十月也言  
天者以夏正

丙之晨龍尾伏辰均服振振取虢之旂鶉之奔奔天策  
焯焯火中成軍虢公其奔

晉惠公時童謠

漢書五行志曰晉惠公賴秦力得立立而

背秦內殺二大夫國人不說及更葬其兄  
恭太子申生而不敬故詩妖作也後與秦  
戰為秦所獲立十四年而死晉人絕之更  
立其兄重耳是為文公皆伯諸侯

恭太子更葬兮後十四年晉亦不昌昌乃在其兄

魯國童謡

漢書五行志曰左氏傳魯文成之世童謡  
也至昭公時有鸛鵒來巢公攻季氏敗出

奔齊居外野次乾侯八年死于外歸葬魯

昭公名裯公子宋立是為定公

鸛之鵠之公出辱之鸛鵠之羽公在外野往饋之馬鸛  
鵠跕跕公在乾侯徵褰與襦鸛鵠之巢遠哉遥遥裯父  
喪勞宋父以驕鸛鵠鵠往歌來哭

楚昭王時童謡

家語曰楚昭王渡江江中有物大如斗圓  
而赤直觸王舟舟人取之王大怪之遍問

羣臣莫之能識王使使聘於魯問于孔子  
孔子曰此為萍實也可剖而食之吉祥也  
唯霸者為能獲焉使者反王遂食之大美  
久之使來以告魯大夫大夫因子游問曰  
夫子何以知其然曰吾昔之鄭過乎陳之  
野聞童謡此楚王之應也是以知之

楚王渡江得萍實大如斗赤如日剖而食之甜如蜜

周末時童謡

家語曰齊有一足之鳥飛習于公朝下止  
於殿前舒翅而跳齊人大怪之使使聘魯  
問於孔子孔子曰此鳥名曰商羊水祥也  
昔童兒有屈其一脚振訊兩脅而跳且謠  
今齊有之其應至矣急告民趨治溝渠脩  
隄防將有大水為災頃之大霖雨水溢泛  
諸國傷害民人唯齊有備不敗

天將大雨商羊鼓舞



漢元帝時童謠

漢書五行志曰元帝時童謠至成帝建始二年三月戊子北宮中井泉稍上溢出南流井水陰也竈烟陽也玉堂金門至尊之居象陰盛而滅陽竊有宮室之應也王莽生於元帝初元四年至成帝封侯為三公輔政因以篡位也

井水溢滅竈烟灌玉堂流金門

漢成帝燕燕童謡

漢書五行志曰成帝時童謡後帝為微行  
出遊常與富平侯張放俱稱富平侯家人  
過陽阿王作樂見舞者趙飛鸞而幸之故  
曰燕燕尾涎涎美好貌也張公子謂富平  
侯也木門倉琅根為宮門銅鍱言將尊貴  
也後遂立為皇后與弟昭儀賊害後宮皇  
子卒皆伏辜所謂燕飛來咏皇孫皇孫死

燕啄矢者也

燕燕尾涎涎張公子時相見木門倉琅根燕飛來啄皇  
孫皇孫死燕啄矢

漢成帝時歌謠

漢書五行志曰成帝時歌謠也桂赤色漢  
家象華不實無繼嗣也王莽自謂黃象黃  
爵巢其顛也

邪徑敗良田讒口亂善人桂樹華不實黃爵巢其顛故

為人所羨今為人所憐

王莽時汝南童謠

漢書曰汝南舊有鴻隙大陂郡以為饒成  
帝時關東數水陂溢為害翟方進為相與  
御史大夫孔光共遣掾行視以為決去陂  
水其地肥美省隄防費而無水憂遂奏罷  
之及翟氏滅鄉里歸惡言方進請陂下良  
田不得而奏罷陂王莽時常枯旱郡中追

怨方進時有童謠子威方進字也

壞陂誰翟子威飯我豆食羹芋魁反乎覆陂當復誰云  
者兩黃鵠

更始時南陽童謠

後漢書五行志曰更始時南陽有童謠是  
時更始在長安世祖為大司馬平定河北  
更始大臣並僭專權故謠妖作也後更始  
遂為赤眉所殺是更始之不諧在赤眉也

世祖自河北興

諧不諧在赤眉得不得在河北

後漢時蜀中童謡

後漢書五行志曰世祖建武六年蜀中童謡是時公孫述僭號於蜀時人竊言王莽稱黃述欲繼之故稱白五銖漢家貨明當復也述遂誅滅

黃牛白腹五銖當復

後漢順帝末京都童謡

後漢書五行志曰順帝之末京都童謡按  
順帝即世孝質短祚大將軍梁冀貪樹疏  
幼以為己功專國號令以贍其私太尉李  
固以為清河王雅性聰明敷詩悅禮加又  
屬親立長則順置善則固而冀建白太后  
策免固徵蠡吾侯遂即至尊固是月幽斃  
于獄暴屍道路而太尉胡廣封安樂鄉侯

司徒趙戒尉亭侯司空袁湯安國亭侯

直如弦死道邊曲如鉤反封侯

後漢桓帝初小麥童謡

後漢書五行志曰桓帝之初天下童謡按  
元嘉中涼州諸羌一時俱反南入蜀漢東  
抄三輔延及并冀大為民害命將出衆每  
戰常負中國益發甲卒麥多委棄但有婦  
女獲刈之也吏買馬君具車者言調發重



及有秩者也請為諸君鼓隴胡者不敢公  
言私咽語也

小麥青青大麥枯誰當穫者婦與姑丈人何在西擊胡  
吏買馬君具車請為諸君鼓隴胡

大麥行

杜甫

大麥乾枯小麥黃婦女行泣夫走藏東至集壁西梁洋  
問誰腰鎌胡與羌豈無蜀兵三千人部領辛苦江山長  
安得如鳥有羽翅託身白雲還故鄉

後漢桓帝初城上烏童謡

後漢書五行志曰桓帝之初京都童謡按此皆謂為政貪也城上烏尾畢逋者處高利獨食不與下共謂人主多聚斂也公為吏子為徒者言蠻夷將畔逆父既為軍吏其子又為卒徒往擊之也一徒死百乘車者言前一人往討胡既死矣後又遣百乘車往車班班入河間者言桓帝將崩乘輿

班班入河間迎靈帝也河間姪女工數錢以錢為室金為堂者靈帝既立其母永樂太后好聚金以為堂也石上慊慊春黃梁言永樂唯積金錢慊慊常若不足使人春黃梁而食之也梁下有懸鼓我欲擊之丞卿怒者言永樂教靈帝使賣官受錢所祿非其人天下忠篤之士怨望欲擊懸鼓以求見丞卿主鼓者亦復諂順怒而止我也

劉昭以為此謠後驗竟為靈帝作言一徒  
似斥桓帝帝貴任羣閹參委機政左右前  
後莫非刑人有同囚徒之長故言寄一徒  
也且又弟則廢黜身無嗣塊然單獨非一  
而何百乘車者乃國之君解犢後徵正膺  
斯數繼以班班尤得以類焉解犢靈帝所  
封也

城上烏尾畢逋公為吏子為徒一徒死百乘車車班班

入河間河間姪女工數錢以錢為室金為堂石上慊慊  
春黃梁梁下有懸鼓我欲擊之丞卿怒

後漢桓帝初京都童謠

後漢五行志曰桓帝之初京都童謠至延  
熹末鄧皇后以譴自殺乃以竇貴人代之  
其父名武字游平拜城門校尉及太后攝  
政為大將軍與太傅陳蕃合心戮力惟德  
是建印綬所加咸得其人豪賢大姓皆絕

望矣

游平賣印自有平不辟豪賢及大姓

後漢桓帝末京都童謠

後漢書五行志曰桓帝之末京都童謠按  
解犢亭屬饒陽河間縣也居無幾何而桓  
帝崩使者與解犢侯皆白蓋車從河間來  
延延衆貌是時御史劉儵建議立靈帝以  
儵為侍中中常侍侯覽畏其親近必當間

已白拜儵泰山太守因令司隸迫切殺之  
朝廷少長思其功效乃拔用其弟郃致位  
司徒此為合諧也劉昭按郡國志饒陽本  
屬涿後屬安平靈帝既是河間王曾孫謠  
言自是有徵無俟河間之縣為驗也

白蓋小車何延延河間來合諧河間來合諧

後漢靈帝末京都童謠

後漢書五行志曰靈帝之末京都童謠至

中平六年少帝登躡至尊獻帝未有爵號  
為中常侍段珪等所執公卿百官皆隨其  
後到河上乃得來還此為非侯非王上北  
芒者也

侯非侯王非王千乘萬騎上北芒

後漢獻帝初童謠

後漢書五行志曰獻帝初童謠公孫瓚以  
為易地當之遂徙鎮焉乃修城積穀以待



天下之變建安三年袁紹攻瓚瓚大敗縊  
其姊妹妻子引火自焚紹兵趨登臺斬之  
初瓚破黃巾殺劉虞乘勝南下侵據齊地  
雄威大振而不能開廓遠圖欲以堅城觀  
時坐聽圍戮斯亦自易地而去世也

燕南坐趙北際中央不合大如礪唯有此中可避世

後漢獻帝初京都童謡

後漢書五行志曰獻帝元初京都童謡按

千里草為董十日卜為卓凡別字之體皆  
從上起左右離合無有從下發端者也今  
二字如此者天意若曰卓自下摩上以臣  
陵君也青青暴盛之貌不得生者亦旋破  
亡也

千里草何青青十日卜不得生

魏明帝景初中童謠

宋書五行志曰魏明帝景初中童謠及宣

王平遼東歸至白屋當還鎮長安會帝疾  
篤急召之乃乘追鋒車東渡河終翦魏室  
如童謡之言也

阿公阿公駕車馬不意阿公東渡河阿公東還當奈何  
魏齊王嘉平中謡

宋書五行志曰魏齊王嘉平中謡按朱虎  
者楚王彪小字也王陵令狐愚聞此謡謀  
立彪事發陵等伏誅彪賜死

白馬素羈西南馳其誰乘者朱虎騎

吳孫亮初童謡

宋書五行志曰吳孫亮初童謡按揚子閣者反語石子岡也鈎絡鈎帶也及諸葛恪死果以葦席裹身篋束其腰投之石子岡後聽恪故吏收葬求之此岡云

吁汝恪何若若蘆葦單衣篋鈎絡於何相求揚子閣

吳孫亮初白黿鳴童謡

宋書五行志曰吳孫亮初公安有白鼃鳴  
童謡按南郡城可長生者有急易以逃也  
明年諸葛恪敗弟融鎮公安亦見鼃融刮  
金印龜服之而死鼃有鱗介甲兵之象也  
白鼃鳴龜背平南郡城中可長生守死不去義無成

白鼃鳴

張籍

天欲雨有東風南谿白鼃鳴窟中六月人家井無水夜  
聞白鼃人盡起

吳孫皓初童謡

宋書五行志曰吳孫皓初童謡按皓尋遷都武昌民汴流供給咸怨毒焉

寧飲建業水不食武昌魚寧還建業死不止武昌居

吳孫皓天紀中童謡

宋書五行志曰吳孫皓天紀中童謡晉武帝聞之加王濬龍驤將軍及征吳江西衆軍無過者而王濬先定秣陵

阿童復阿童銜刀遊渡江不畏岸上虎但畏水中龍

晉武帝太康後童謠三首

宋書五行志曰晉武帝太康後江南童謠  
于時吳人皆謂在孫氏子孫故竊發為亂  
者相繼按橫目者四字自吳亡至晉元帝  
興幾四十年皆如童謠之言元帝懦而少  
斷局縮肉直斥之也干寶云不知所斥諱  
之也

局縮肉數橫目中國當敗吳當復

宮門柱且莫朽吳當復在三十年後

雞鳴不拊翼吳復不用力

晉惠帝永熙中童謡

晉書五行志曰惠帝永熙中童謡時楊駿  
專權楚王用事故言荆筆楊板二人不誅  
則君臣禮悖故云幾作驢也

二月末三月初荆筆楊板行詔書宮中人馬幾作驢



晉惠帝元康中京洛童謠二首

晉書五行志曰惠帝元康中京洛童謠南風賈后字也白晉行也沙門太子小字也魯賈謚國也言賈后将與謚為亂以危太子而趙王因讐咀豪賢以成篡奪也按賈后傳有此謠云南風烈烈吹黃沙遙望魯國鬱嵯峨前至三月滅汝家與五行志所載不同其後賈謚既誅賈后尋以廢死

宋書五行志曰是時愍懷破失衆望卒以  
廢黜不得其死焉

南風起吹白沙遙望魯國何嵯峨千歲髑髏生齒牙  
城東馬子莫隴叟比至來年纏汝髮

晉元康中洛中童謠

宋書五行志曰晉元康中趙王倫既篡洛  
中有童謠數月而齊王成都河間義兵同  
會誅倫按成都西蕃而在鄴故曰虎從北

來齊東蕃而在許故曰龍從南來河間水  
匪而在關中故曰水從西來齊留輔政居  
宮西有無君之心故曰登城者也

虎從北來鼻頭汗龍從南來登城看水從西來何濯濯  
晉惠帝時洛陽童謡

晉書曰惠帝時洛陽童謡明年而胡賊石  
勒劉羽反

鄴中女子莫千妖前至三月抱胡腰

晉惠帝大安中童謡

宋書五行志曰晉惠帝大安中童謡其後  
中原大亂宗蕃多絶唯琅邪汝南西陽南  
頓彭城同江表而元帝嗣晉矣

五馬游渡江一馬化為龍

晉懷帝永嘉初謡

晉書五行志曰苟晞將破汲桑時有此謡  
司馬越由是惡晞奪其兗州隙難遂構焉

按列傳東海孝獻王越字元超懷帝永嘉  
初出鎮許昌自許昌率荀晞及冀州刺史  
丁劭討汲桑破之越還于許長史潘滔說  
之曰兖州天下樞要公宜自牧乃轉荀晞  
為青州刺史由是與晞有隙

元超兄弟大洛度上桑打樵為荀作

晉懷帝永嘉初童謡

晉書五行志曰司馬越還洛時童謡也按

列傳越既與荀晞構怨尋詔越為丞相領  
兖州牧督兖豫司冀幽并六州越辭丞相  
不受自許遷于鄆城移屯濮陽又遷于滎  
陽後自滎陽還洛帝紀曰永嘉三年三月  
丁巳東海王越歸京師是也

洛中大鼠長尺二若不早去大狗至

晉永嘉中童謡

三十國春秋曰永嘉中童謡也

秦川中血沒腕唯有涼州倚柱觀

晉明帝太寧初童謡

晉書五行志曰明帝太寧初童謡及明帝  
崩成帝幼為蘇峻所逼遷于石頭御膳不  
足此大馬死小馬餓也高山峻也言峻尋  
死石峻弟蘇石也峻死後石據石頭尋亦  
破此山崩石破之應也

惻惻力力放馬山側大馬死小馬餓高山崩石自破

晉哀帝隆和初童謠

晉書五行志曰哀帝隆和初童謠朝廷聞而惡之改年曰興寧民復歌曰雖復改興寧亦復無聊生哀帝尋崩升平五年而穆帝崩不滿年不至十年也

升平不滿年隆和那得久桓公入石頭陛下徒跣足  
晉太和末童謠

晉書五行志曰太和末童謠及海西公被



廢百姓耕其門以種小麥遂如謠言

犁牛耕御路白門種小麥

晉孝武太元末京口謠

晉書五行志曰孝武帝太元末京口謠尋  
王恭起兵誅王國寶旋為劉牢之所敗故  
言拉颯樓也

黃雌雞莫作雄父啼一旦去毛衣衣被拉颯樓

樂府詩集卷八十八

欽定四庫全書

集部

樂府詩集卷

今九至  
九十一

詳校官庶吉士臣柳邁祖

助教臣常循履勘

總校官知縣臣繆琪

校對官編修臣秦瀛

謄錄監生臣孫承基

欽定四庫全書

樂府詩集卷八十九

宋 郭茂倩 輯

雜歌謠辭

謠辭

晉安帝元興初童謠

宋書五行志曰晉桓玄既篡有此童謠及  
玄敗走至江陵五月中誅如其期焉時又

有民謠云征鍾落地桓迸走征種至穢之  
服桓四體之下稱玄自下居上猶征種之  
則歌謠下體之詠民口也而云落地墜地  
之祥迸走之言其驗明矣按帝紀桓玄篡  
位在安帝元興二年十二月也

草生及馬腹烏啄桓玄目

晉安帝元興中童謠

宋書五行志曰晉安帝元興中桓玄既得

志而有童謡及玄敗走而諸桓悉誅焉郎  
君司馬元顯也

長干巷巷長干今年殺郎君明年斬諸桓

晉安帝義熙初童謡

晉書五行志曰安帝義熙初童謡時官養  
盧龍寵以金紫奉以名州養之已極而龍  
不能懷我好音舉兵內伐遂成讐敵也及  
敗斬伐其黨如草木之成積焉按列傳盧

循小字元龍元興二年寇廣州遂刺史吳  
隱之自攝州事號平南將軍安帝乃假循  
征虜將軍廣州刺史義熙中劉裕破循于  
豫章循走交州為刺史杜慧度所殺

官家養蘆花成荻蘆生不止自成積

晉安帝義熙初謠二首

宋書五行志曰盧龍據有廣州民間有謠  
後擁上流數州之地內逼京輦應天半之

言時復有謠言龍後果敗不得入石頭矣

蘆生漫漫竟天半

蘆橙橙逐水流東風忽如起那得入石頭

晉吳中童謠

宋書五行志曰晉庾義在吳郡時吳中童謠無幾而庾義王洽相繼亡

寧食下湖荇不食上湖蓴庾吳沒命喪復殺王領軍

晉荊州童謠

晉書五行志曰殷仲堪在荊州時童謠未幾而仲堪敗桓玄遂有荊州

亡籠目繩縛腹殷當敗桓當復

晉京口謠

宋書五行志曰晉王恭鎮荊口誅王國寶百姓為此謠按昔年食白飯言得志也今年食麥麩麥麩麤穢其精已去明將敗也天公將加譴謫而誅之也捻嚙喉氣不通



死之祥也敗復敗丁寧之辭也恭尋死京  
都大行咳疾而喉並喝焉

昔年食白飯今年食麥麴天公誅謫汝教汝捻嚨喉嚨  
喉喝復喝京口敗復敗

晉京口民間謠二首

宋書五行志曰晉王恭在京口民間忽有  
此謠按黃字上恭字頭也小人恭字下也  
尋如謠言

黃頭小人欲作賊阿公在城下指縛得

黃頭小人欲作亂賴得黃刀作蕃杆

符堅時長安謠

晉書載記曰符堅時長安有此謠堅以鳳  
凰非梧桐不棲非竹實不食乃植桐竹數  
十萬株于阿房城以待之後堅為慕容沖  
所敗入止阿房城焉鳳凰沖小字也

鳳凰鳳凰止阿房

符堅初童謠

晉書五行志曰符堅初有此童謠及堅敗於淝水為姚萇所殺在偽位凡三十年

阿堅連牽三十年後若欲敗時當在江湖邊

符堅時童謠

晉書載記曰符堅彊盛時有此童謠堅聞而惡之每征伐戒軍候云有新城者避之後因壽陽之敗其國大亂竟死於新城佛

寺五行志曰時復有謠云魚羊田斗當滅  
秦識者以為魚羊鮮也田斗卑也堅自號  
秦言滅之者鮮卑也其羣臣諫堅令盡誅  
鮮卑堅不從及淮南敗還初為慕容沖所  
攻又為姚萇所殺身死國滅云

河水清復清符詔死新城

宋元嘉中魏地童謠

南史曰宋元嘉二十七年魏太武帝圍汝

南成文帝遣臧質比救至盱台太武已過  
淮自廣陵返攻盱台就質求酒質封溲便  
與之且報書云不聞童謠言邪虜馬飲江  
水佛狸死卯年冥期使然非復人事爾智  
識及衆豈能勝苻堅邪頃年展爾陸梁者  
是爾未飲江太歲未卯耳時魏地有童謠  
故質引之云

軺車北來如穿雉不意虜馬飲江水虜王北歸石濟死

虜欲渡江天不徙

梁武帝時謠

南史曰梁武帝天監元年十一月立長子  
統為皇太子時民間有謠按鹿子開者反  
語為來子哭也後太子果薨是時長子歡  
為徐州刺史以嫡孫次應嗣位而帝意在  
晉安王猶豫未決及立晉安王為皇太子  
而歡止封豫章郡王還任謠言心徘徊者

未定也城中諸少年逐歡歸去來者復還  
徐方之象也統即昭明太子也

鹿子開城門城門鹿子開當開復未開使我心徘徊城  
中諸少年逐歡歸去來

梁大同中童謡

隋書五行志曰梁大同中有童謡其後侯  
景破丹楊乘白馬以青絲為羈勒以應之

青絲白馬壽陽來

梁末童謡

南史曰梁末有童謡及王僧辯滅說者以  
為僧辯本乘巴馬以擊侯景馬上郎王字  
也塵謂陳也江東謂殺羊角為皂莢隋氏  
姓楊楊羊也言陳終滅於隋也

可憐巴馬子一日行千里不見馬上郎但有黃塵起黃  
塵汚人衣皂莢相料理

陳初童謡



隋書五行志曰陳初有童謠其後陳主果  
為韓擒所敗擒本名擒虎黃班之謂也破  
建康之始復乘青驄馬往反時節皆應

黃班青驄馬發自壽陽溪來時冬氣未去日春風始

同前

御路種竹篠蕭蕭已復起合盤貯蓬貯無復揚塵已

陳初時謠

日西夜烏飛拔劒倚梁柱歸去來歸山下



後魏宣武孝明時謠

北史魏本紀曰宣武孝明間謠識者以為  
索謂魏本索髮焦梨狗子指宇文泰俗謂  
之黑獺也

狐非狐貉非貉焦梨狗子齧斷索

後魏末童謠

北史齊本紀曰後魏末文宣末受禪時有  
童謠按縈然兩頭於文為高河邊穀耨為

水邊羊指帝名也於是徐之才勸帝受禪  
一束藁兩頭然河邊殺雛飛上天

東魏童謡

北史曰東魏孝靜帝之將立也時有童謡  
按青雀子謂靜帝實清河王之世子鸚鵡  
謂齊神武也後竟為齊所滅

可憐青雀子飛來鄴城裏羽翮垂欲成化作鸚鵡子

北齊鄴都童謡

隋書五行志曰齊神武始移都于鄴時有  
童謠按魏孝靜帝者清河王之子也后則  
神武之女鄴都宮室未備即逢禪代作窠  
未成之効也孝靜尋崩文宣以后為太原  
長公主降於楊愔時婁后尚在故言寄書  
於父母新婦子斥后也

可憐青雀子飛入鄴城裏作窠猶未成舉頭失鄉里寄  
言與父母好看新婦子

北齊武定中童謡

隋書五行志曰武定中有童謡按高者齊  
姓也澄文襄名五年神武崩摧折之應七  
年文襄遇盜所害澄滅之徵也

百尺高竿摧折水底然燈澄滅

北齊文宣時謡

北史齊本紀曰文宣時謡按帝以午年生  
故曰馬子三臺石李龍舊居故曰石室三

千六百日十年也文宣在位十年果如謠

言

馬子入石室三千六百日

北齊後主武平初童謠

隋書五行志曰武平元年童謠按其年四

月隴東王胡長仁謀遣刺客殺和士開事

露反為士開所譖而死

狐截尾你欲除我我除你

北齊後主武平中童謠二首

隋書五行志曰武平二年童謠小兒唱訖  
一時拍手云殺却至七月二十五日御史  
中丞琅邪王儼執士開送於南臺而斬之  
是歲又有童謠而七月士開被誅九月琅  
邪王遇害十一月趙彥深出為西兗州刺  
史

和士開七月三十日將你向南臺

七月刈禾傷早九月喫饀正好十月洗蕩飯笊十一月  
出却趙老

北齊後主武平末童謠

隋書五行志曰武平末有童謠時穆后母  
子淫辟干預朝政時人患之穆后小字黃  
花尋逢齊亡欲落之應也

黃花勢欲落清尊但滿酌

北齊末鄴中童謠



隋書五行志曰北齊末鄴中有童謠未幾

周師入鄴

金作埽帚玉作把淨埽殿屋迎西家

周初童謠

隋書五行志曰周初有童謠按靜帝隋氏  
之甥既遜位而崩諸舅强盛

白楊樹頭金鷄鳴祇有阿舅無外甥

隋煬帝大業中童謠

隋書五行志曰煬帝大業中童謠其後李  
密坐楊玄感之逆為吏所拘在路逃叛潛  
結羣盜自陽城山而來襲破洛口倉後復  
屯兵苑內莫浪語密也字文化及自號許  
國尋亦破滅誰道許者蓋驚疑之辭也

桃李子鴻鵠遶陽山宛轉花林裏莫浪語誰道許

唐武德初童謠

新唐書五行志曰竇建德未敗時有此謠

也

豆入牛口勢不得久

唐貞觀中高昌國童謠

唐書曰貞觀中高昌國有此童謠其國王  
文泰使人捕其初唱者不能得帝紀曰十  
三年以侯君集為交河道行軍大總管帥  
師伐高昌十四年平之以其地置西州又  
置安西都護府

高昌兵馬如霜雪漢家兵馬如日月日月照霜雪回首  
自消滅

唐永淳初童謠

新唐書五行志曰高宗永淳元年童謠是  
歲七月東都大雨人多殍殍

新禾不入箱新麥不入場迨及八九月狗吠空垣墻

唐高宗永淳中童謠

新唐書五行志曰高宗自調露中欲封嵩

山屬突厥叛而止後又欲封以吐蕃入寇  
遂停時有童謡按舊書武后自封岱之後  
勸帝封中嶽每下詔草儀注即歲饑邊事  
警急而止永淳中既至山下未及行禮遘  
疾還宮而崩

嵩山凡幾層不畏登不得但恐不得登三度徵兵馬傍  
道打騰騰

唐武后時童謡

紅綠複裙長千里萬國聞香

唐神龍中謠

新唐書五行志曰中宗神龍以後民謠按  
山南唐也烏鵲窠者人居寡也山北胡也  
金駱駝者虜獲而重載也

山南烏鵲窠山北金駱駝鏤柯不鑿孔斧子不施柯

唐中宗時童謠

新唐書五行志曰安樂公主於洛州造安

樂寺時有童謡按舊書安樂公主中宗幼  
女韋皇后所生初降武崇訓崇訓死降武  
延秀所造安樂佛寺擬於宮殿巧妙過之  
可憐安樂寺了了樹頭懸

唐景龍中謡

新唐書五行志曰景龍中民謡也按會要  
東都聖善寺神龍初中宗為武太后追福  
所造景龍中復增廣焉

可憐聖善寺身著綠毛衣牽來河裏飲踏殺鯉魚兒

唐天寶中童謠

新唐書五行志曰天寶中安祿山未反時  
童謠按舊書天寶十四載祿山以范陽叛  
明年竊號燕國

燕燕飛上天天上女兒鋪白氍毹上有千錢

唐天寶中幽謠

新唐書五行志曰天寶中幽州有此謠也



舊來誇戴竿今日不堪看但看五月裏清水河邊見契  
丹

唐德宗時童謡

新唐書五行志曰朱泚未敗前兩月有童  
謡按舊書建中四年朱泚以涇原兵叛僭  
號曰大秦明年改號曰漢是歲六月兵敗  
而死

一隻筋兩頭朱五六月化為咀

唐元和初童謠

新唐書五行志曰元和初童謠既畢乃轉身曰舞了也按舊書志云為十年六月三日武元衡為盜所害之應本傳云打麥謂打麥時也麥打謂暗中突擊也三三三謂六月三日也既而旋其袖曰舞了也謂元衡之卒也

打麥麥打三三三舞了也

唐咸通中童謡

新唐書五行志曰懿宗咸通七年童謡也

草青青被嚴霜鵲始後看顛狂

唐咸通末成都童謡

新唐書五行志曰咸通十四年成都有童謡是歲歲陰在己明年在午己蛇也午馬也

咸通癸巳出無所之蛇去馬來道路稍開頭無片瓦地

有殘灰

唐僖宗時童謠

新唐書五行志曰僖宗時有此童謠按舊  
書云乾符中仍歲凶荒人飢為盜河南尤  
甚曹州人王仙芝尚君長聚盜起於濮陽  
攻剽城邑陷曹濮鄆等州五年仙芝敗而  
黃巢之衆攻江西云

金色蝦蟆爭努眼  
鄱却曹州天下反

唐乾符中童謠

新唐書五行志曰乾符六年童謠也

八月無霜塞草青將軍騎馬步空城漢家天子西巡狩  
猶向江東更索兵

唐中和初童謠

新唐書五行志曰中和初有此童謠按舊  
書中和四年黃巢既敗以其殘衆東走李  
克用追擊至濟陰而還賊散於兗鄆黃巢

入泰山至狼虎谷為其將林言所殺

黃巢走秦山東死在翁家翁

梁太祖時蜀中謠

五代史曰劉知俊初事梁太祖後奔蜀王  
建雖加寵待然亦忌之常謂近侍曰劉知  
俊非爾輩能駕馭不如早為之所有嫉之  
者於里巷間作此謠知俊色黥丑生縲繩  
者王氏子孫皆以宗承為名故以此猜疑

之遂見殺於成都

黑牛出圈梭繩斷

樂府詩集卷八十九



欽定四庫全書

樂府詩集卷九十

宋 郭茂倩 輯

新樂府辭

樂府之名起於漢魏自孝惠帝時夏侯寬為樂府令始以名官至武帝乃立樂府采詩夜誦有趙代秦楚之謳則採歌謠被聲樂其來蓋亦遠矣凡樂府歌辭有因聲而作歌者若魏之三調

歌詩因弦管金石造歌以被之是也有因歌而造聲者若清商吳聲諸曲始皆徒歌既而被之絃管是也有有聲有辭者若郊廟相和饒歌橫吹等曲是也有有辭無聲者若後人之所述作未必盡被於金石是也新樂府者皆唐世之新歌也以其辭實樂府而未常被於聲故曰新樂府也元微之病後人沿襲古題唱和重複謂不如寓意古題刺美見事猶有詩人引古以諷之義近代唯杜甫悲陳

陶哀江頭兵車麗人等歌行率皆即事名篇無復  
倚旁乃與白樂天李公垂輩謂是為當遂不復更  
擬古題因劉猛李餘賦樂府詩咸有新意乃作出  
門等行十餘篇其有雖用古題全無古義則出門  
行不言離別將進酒特書列女其或頗同古義全  
創新詞則田家止述軍輸捉捕請先蠲蟻如此之  
類皆名樂府由是觀之自風雅之作以至于今莫  
非諷興當時之事以貽後世之審音者儻採歌謠

以被聲樂則新樂府其庶幾焉

樂府雜題

新曲

謝偃

青樓綺閣已含春  
凝妝豔粉復如神  
細細輕裾全漏影  
離離薄扇詎障塵  
樽中酒色恒宜滿  
曲裏歌聲不厭新  
紫燕欲飛先遠棟  
黃鶯始哢即嬌人  
掠亂絲垂昏柳陌  
參差濃葉暗桑津  
上客莫畏斜日晚  
自有西園明月輪

同前二首

長孫無忌

家住朝歌下早傳名結伴來遊淇水上舊長情玉佩金鈿隨  
步動雲羅霧縠逐風輕轉目機心懸自許何須更待聽琴聲  
迴雪凌波遊洛浦遇陳王婉約娉婷工語笑侍蘭房笑  
蓉綺帳還開揜翡翠珠被爛齊光長願今宵奉顏色不  
愛聞簫逐鳳凰

湘川新曲二首

杜易簡

昭潭深無底橘州淺而浮本欲凌波去翻為目成留願  
君稍弭楫無令賤妾羞

二八相招攜採菱渡前谿弱腕隨橈起纖腰向舸低自  
解看花笑憎聞染竹啼

小曲新辭二首

白居易

霽色鮮宮殿秋聲脆管弦聖明千載樂歲歲似今年  
紅裾明月夜碧簟早秋時好向昭陽宿天源玉漏遲

公子行

劉希夷

天津橋下陽春水天津橋上繁華子馬聲迴合青雲外  
人影搖揚綠波裏綠波青迴玉為砂青雲離披錦作霞

可憐楊柳傷心樹可憐桃李斷腸花此日遨遊邀美女此  
時歌舞入倡家倡家美女鬱金香飛去飛來公子傍的的  
珠簾白日映娥娥玉顏紅粉粧花際徘徊雙蛺蝶池邊顧  
步兩鴛鴦傾國傾城漢武帝為雲為雨楚襄王古來容光  
人所羨況復今日遙相見願作輕羅著細腰願為明鏡分  
嬌面與君相向轉相親與君雙棲共一身願作貞松千歲  
古誰論芳槿一朝新百年同謝西山日千秋萬古北邙塵

同前

陳羽

金羈白面郎何處踏青來馬嬌郎半醉蹉蹉望樓臺似  
見樓上人玲瓏牕戶開隔花聞一笑落日不知廻

同前

韓琮

紫袖長衫色銀蟾半臂花帶裝盤水玉鞍繡坐雲霞別  
殿承恩澤飛龍賜渥注控羅青裊轡鏤象碧重葩意氣  
催歌舞闌珊走鈿車袖彰雲縹緲釵轉鳳歌斜珠卷迎  
歸箔紅籠晃醉紗唯無難夜日不得似仙家

同前

顧況



輕薄兒白如玉紫陌春風纏馬足雙鐙懸金縷鶻飛長  
衫刺雪生犀束綠槐夾道陰初成珊瑚幾節敲流星紅  
肌拂拂酒光獐當街背拉金吾行朝遊鼗鼗鼓聲發暮  
遊鼗鼗鼓聲絕入門不肯自昇堂美人扶踏金階月

同前

聶夷中

漢代多豪族恩深益嬌逸走一作驟馬踏殺人街吏不敢

詰紅樓宴青春數里望雲蔚金缸焰勝晝不畏落暉疾  
美人盡如月南威不敢匹芙蓉自天來不向水中出綺

席憂雲和碧簫吹鳳質唯恨魯陽死無人駐白日  
花樹出牆頭花裏誰家樓一行書不讀身封萬戶侯美  
人樓上歌不是古涼州

同前

于鵠

少年初拜大長秋半醉垂鞭見列侯馬上抱雞三市鬪  
袖中攜劍五陵遊玉簫金管迎歸院錦袖紅妝擁上樓  
更向苑東新買宅碧波春水入門流

同前

雍陶

公子風流輕錦繡新裁白紵作春衣金鞭留當誰家酒  
拂柳穿花信馬歸

同前二首

張祜

玉堂前後畫簾垂立卻花驄待出時紅粉美人擎酒勸  
錦衣年少臂鷹隨輕將玉杖敲花片旋把金鞭約柳絲  
晴日獨遊三五騎等閒行傍曲江池

春色滿城池杯盤看處移鎗金斜雁子鞍帕嫩鶯兒買  
笑欹桃李尋歌折柳枝可憐明月夜長是管弦隨

同前

孟賓宇

錦衣紅奪彩霞明  
侵曉春遊向野庭  
不識農夫辛苦力  
驕驄踏爛麥青青

將軍行

劉希夷

將軍闢轅門  
耿介當風立  
諸將欲言事  
逡巡不敢入  
劒氣射雲天  
鼓聲振原隰  
黃塵塞路起  
走馬追兵急  
彎弓從此去  
飛箭如雨集  
截圍一百重  
斬首五千級  
代馬流血死  
胡人抱鞍泣  
古來養甲兵  
有事常討襲  
無我廟堂

運坐使干戈戢獻凱歸京都軍容何翕習

同前

張籍

彈箏峽東有烽塵天子擇日拜將軍蓬萊殿前賜六縣  
還領禁兵為部曲當朝受詔不辭家夜向咸陽原上宿  
戰車彭彭旌旗動三十六軍齊上隴隴頭戰勝夜亦行  
分兵處處收舊城羌兒殺盡陰磧暮擾擾唯有牛羊聲  
邊人親戚曾戰歿今逐官軍收舊骨磧西行見萬里空  
樂府獨奏將軍功

老將行

王維

少年十五二十時步行奪得胡馬騎射殺山中白額虎  
肯數鄴下黃鬚兒一身轉戰三千里一劍曾當百萬師  
漢兵奮迅如霹靂虜騎崩騰畏疾藜衛青不敗由天幸  
李廣無功緣數奇自從棄置便衰朽世事蹉跎成白首  
昔時飛箭無全目今日垂楊生左肘路傍時買故侯瓜  
門前學種先生柳茫茫古木連窮巷寥落寒山對虛牖  
誓令疎勒出飛泉不似潁川空使酒賀蘭山下陣如雲

羽檄交馳日夕聞節使三河募年少詔書五道出將軍  
試拂鐵衣如雪色聊持寶劔動星文願得燕弓射大將  
恥令越甲鳴吳軍莫嫌舊日雲中守猶堪一戰取功勲

燕支行

漢家天將才且雄來時謁帝明光宮萬乘親推雙闕下  
千官出餞五陵東誓辭甲第金門裏身作長城玉塞中  
衛霍才堪一騎將朝廷莫數貳師功趙魏燕韓多勁卒  
關西俠少何咆勃報讎只是聞嘗膽飲酒不曾妨刮骨

畫戟琱戈白日寒連旗大旆黃塵沒疊鼓逆翻瀚海波  
鳴笳亂動關山月麒麟錦帶佩吳鉤颯沓青驪躍紫騮  
拔劍已斷天驕臂歸鞍共飲月支頭漢軍大呼一當百  
虜騎相看哭且愁教戰雖令赴湯火終知上將伐謀猷

桃源行

王維

宋陶潛桃花源記曰晉太元中武陵人沿

溪捕魚忽

一作路

逢桃花林夾岸數百步中

無雜樹芳華鮮美落英繽紛漁人甚異之



復前行林盡水源得一山山有小口髣髴  
有光乃捨船而入初纔通人行數十步豁  
然開朗土地平曠屋舍儼然有良田美池  
桑竹之屬阡陌交通雞犬相聞其中往來  
種作男女衣著悉如外人黃髮垂髫怡然  
自樂見漁人大驚問所從來邀還家為設  
酒殺雞自云先世避秦亂率妻子邑人來  
此不復出遂與外人隔絕問今何世乃不

知有漢無論魏晉漁人為具言皆歎惋停  
數日辭去曰此中人語不足為外人道也  
既出得船復由向路處處誌之其後欲往  
迷不復得路云

漁舟逐水愛山春兩岸桃花夾古津坐看紅樹不知遠  
行盡青溪忽值人山口潛行始隈隩山開曠望旋平陸  
遙看一處攢雲樹近入千家散花竹樵客初傳漢姓名  
居人未改秦衣服居人共住武陵源還從物外起田園

月明松下房櫳靜日出雲中雞犬喧  
驚聞俗客爭來集競引還家問都邑  
平明閭巷掃花開薄暮漁樵乘水入  
初因避地去人間更問神仙遂不還  
峽裏誰知有人事世中遙望空雲山  
不疑靈境難聞見塵心未盡思鄉縣  
出洞無論隔山水辭家終擬長遊行  
自謂經過舊不迷安知峰壑今來變  
常時只記入山深清溪幾度到雲林  
春來遍是桃花水不辨仙源何處尋

同前

劉禹錫

漁舟何招招浮在武陵水拖綸擲餌信流去誤入桃源  
行數里清源尋盡花綿綿踏花覓徑至洞前洞門蒼黑  
烟霧生暗行數步逢虛明俗人毛骨驚仙子爭來致詞  
何至此須臾皆破冰雪顏笑語一作言委曲問世間因嗟

隱身來種玉不知人世如風燭筵羞石髓勸客食燈熱  
松脂留客宿雞聲犬聲遙相聞曉光蔥籠開五雲漁人  
振衣起出戶滿庭無路花紛紛飄然恐迷鄉縣處一息  
不肯桃源住桃花滿溪水似鏡塵心如垢洗不去仙家

一出尋無蹤至今水流山重重

春女行

劉希夷

春女顏如玉怨歌陽春曲巫山春樹紅沅江春草綠自  
憐妖豔姿妝成獨見時愁心伴楊柳春盡亂如絲目極  
千里餘悠悠春江水遙望玉關人愁卧金閨裏尚言春  
花落不知秋風起嬌愛猶未終悲涼從此始憶昔楚王  
宮玉樓妝粉紅纖腰弄明月長袖拂春風容華委曲山  
光陰不可還桑林變東海富貴今何在寄言桃李容胡

為閨閣重但看楚王墓唯有數株松

同前

王翰

紫臺穹跨連綠波紅軒鈴匝垂纖羅中有一人金作面  
隔幌玲瓏遙可見忽聞黃鳥鳴且悲鏡邊含笑著春衣  
羅袖嬋娟似無力行拾落花比容色落花一度無再春  
人生作樂須及辰君不見楚王臺上紅顏子今日皆成  
狐兔塵

洛陽女兒行

王維

女兒女兒對門坐纔可顏容十五餘良人玉勒乘驄馬  
侍女金盤膾鯉魚畫閣朱樓盡相望紅桃綠柳垂簷向  
羅幃送上七香車寶扇迎歸九華帳狂夫富貴在青春  
意氣驕奢劇季倫自憐碧玉親教舞不惜珊瑚持與人  
春窗曙滅九微火九微片片飛花璫戲罷曾無理曲時  
妝成祇是薰香坐城中相識盡繁華日夜經過趙李家  
誰憐越女顏如玉貧賤江頭自浣沙

扶南曲五首

翠羽流蘇帳春曙不開羞從面色起嬌逐語聲來早  
向昭陽殿君王中使催

堂上清弦動堂前綺席陳齊歌盧女曲雙舞洛陽人傾  
國徒相看寧知心所親

香氣傳空滿妝華影箔通歌間天伏外舞出御筵中日  
莫歸何處花間長樂宮

宮女還金屋將眠復畏明入春輕衣好半夜薄妝成拂  
曙朝前殿玉除多珮聲



朝日照綺窗佳人坐臨鏡散黛恨猶輕插釵嫌未正同  
心勿遽遊幸得春妝竟

笑歌行

李白

笑矣乎笑矣乎君不見曲如鉤古人知爾封公侯君不  
見直如弦古人知爾死道邊張儀所以只掉三寸舌蘇  
秦所以不壅二頃田笑矣乎笑矣乎君不見滄浪老人  
歌一曲還道滄浪濯吾足平生不解謀此身虛作離騷  
遣人讀笑矣乎笑矣乎趙有豫讓楚屈平賣身買得千

年名巢由洗耳有何益夷齊餓死終無成君愛身後名  
我愛眼前酒飲酒眼前樂虛名何處有男兒窮通當有  
時曲腰向君君不知猛虎不看機上肉洪鑪不鑄囊中  
錐笑矣乎笑矣乎寧武子朱買臣叩角行歌皆負薪今  
日逢君君不識豈得不如佯狂人

江夏行

憶昔嬌小姿春心亦自持為言嫁夫婿得免長相思誰  
知嫁商賈令人却愁苦自從為夫妻何曾在鄉土去年

下揚州相送黃鶴樓眼看帆去遠心逐江水流只言期  
一載誰為歷三秋使妾腸欲斷恨君情悠悠東家西舍  
同時發北去南來不逾月未知行李遊何方作箇音書  
能斷絕適來往南浦欲問西江船正見當壚女紅妝二  
八年一種為人妻獨自多悲悽對鏡便垂淚逢人只欲  
啼不如輕薄兒旦莫長追隨悔作商人婦青春長別離  
如今正好同歡樂君去容華誰得知

橫江詞六首

人言橫江好儂道橫江惡一風一日吹倒山

一作猛風吹倒天門

山白浪高於瓦官閣

海潮南去過潯陽牛渚由來險馬當橫江欲渡風波惡  
一水牽愁萬里長

橫江西望阻西秦漢水東流

一作楚揚子津水東連

白浪如山

那可渡狂風愁殺峭帆人

海神東

一作來

過惡風回浪打天門石壁開浙江八月何

如此濤似連山噴雪來

橫江館前津吏迎向余東指海雲生  
郎今欲渡緣何事  
如此風波不可行

日暈天風霧不開  
海鯨東盛百川回  
驚波一起三山動  
公無渡河歸去來

靜夜思

牀前看月光疑是地上霜  
舉頭望山月低頭思故鄉

黃葛篇

黃葛生洛溪黃花自綿幕  
青烟蔓長條繚繞幾百尺  
閨

人費素手採緝作締絡縫為絕國衣遠寄日南客蒼梧  
大火落暑服莫輕擲此物雖過時是妾手中跡

采葛行

鮑溶

春溪幾回葛花黃黃麝引子山山香蠻女不惜手足損  
鉤刀一一牽柔長葛絲茸茸春雪體深澗澤泉清處洗  
殷勤十指蠶吐絲當窗嫋娜聲高機織成一尺無一兩  
供進天子五月衣水精夏殿開涼戶冰山繞座猶難御  
衣親玉體又何如杳然獨對秋風曙鏡湖女兒嫁鮫人

蛟綃逼穴色不分吳中肉簟泛清水搖曳勝被三素雲  
自茲貢薦無人惜那敢更爭龍手跡蠻女將來海市頭  
賣與嶺南貧估客

樂府詩集卷九十



欽定四庫全書

樂府詩集卷九十一

宋 郭茂倩 輯

新樂府辭

樂府雜題

祖龍行

韋楚老

漢書五行志曰秦始皇三十六年鄭客從  
關東來至華陰望見素車白馬從華山上

下知其非人道住止而待之遂至持璧與  
客曰為我遺鎬池君因言今年祖龍死忽  
不見鄭客奉璧即始皇二十八年過江所  
湛壁也是歲始皇死後三年而秦滅顏師  
古曰此直江神告鎬池之神以始皇將死  
爾蘇林曰祖始也龍人君象謂始皇也應  
劭曰祖人之先龍君之象祖龍行蓋出於  
此

黑雲兵氣射天裂壯士朝眠夢寃結祖龍一夜死沙丘  
胡亥空隨鮑魚轍腐肉偷生二千里偽書先賜扶蘇死  
墓接驪山土未乾瑞光已向芒碭起陳勝城中鼓三下  
秦家天地如崩瓦龍蛇撩亂入咸陽少帝空隨漢家馬

鄴都引

張說

君不見魏武草創爭天祿羣雄睚眦相馳逐畫攜壯士  
破堅陣夜接詞人賦華屋都邑繚繞西山陽桑榆滂滂  
漳河曲城郭為墟人改代但有西園明月在鄴傍高塚

多貴臣蛾眉曼睂共灰塵試上銅臺歌舞處唯有秋風  
愁殺人

孟門行

崔顥

黃雀銜黃花

一作  
蘋花

翩翩傍簷隙本擬報君恩如何反彈

射金蟲美酒滿座春平原愛財多衆賓滿堂盡是忠義

士何意得有讒諛人諛人翻覆那可道能令君心不自  
保北園新栽桃李枝根株未固何轉移成陰結子君自  
取若問傍人那得知

邯鄲宮人怨

邯鄲陌上三月春莫行逢見一婦人自言鄉里本燕趙  
少小隨家西入秦母兄憐愛無儔侶五歲名為阿嬌女  
七歲丰茸好顏色八歲點慧能言語十三兄弟教詩書  
十五青樓學歌舞我家青樓臨道傍紗窗綺幔暗聞香  
日莫笙歌君駐馬春日妝梳妾斷腸不用城南使君壻  
本求三十侍中郎何知漢帝好顏色玉輦攜歸登建章  
建章宮殿不知數萬戶千門深且長百堵椒塗接青瑣

九華閣道連洞房水晶簾箔雲母扇瑤璃窗牖玳瑁牀  
歲歲年年奉歡宴嬌貴容華誰不羨恩情莫比陳皇后  
寵愛全勝趙飛鵲瑤房侍寢世莫知金屋更衣人不見  
誰言一朝復一日君王棄世市朝變宮車出葬茂陵田  
賤妾猶留長信殿一朝太子升至尊兩宮人事如掌翻  
同時侍女見讒毀後來新人莫一作不敢言兄弟印綬皆  
被奪昔年賞賜不復存一旦放歸舊鄉里乘車垂淚還  
入門父母慙我曾富貴嫁與西舍金王孫念此翻覆復

何道百年盛衰誰能保憶昨尚如春日花悲今已作秋  
時草少年去去莫停鞭人生萬事由上天非我今日獨  
如此古今歇薄皆共然

吳宮怨

衛 萬

君不見吳王宮閣臨江起不卷珠簾見江水曉氣晴來  
雙闕間潮聲夜落千門裏句踐城中非舊春姑蘇臺下  
起黃塵祇今唯有西江月曾照吳王宮裏人

同前

張 籍

吳宮四面秋江水  
江清露白芙蓉死  
吳王醉後欲更衣  
座上美人嬌不起  
宮中千門復萬戶  
君恩返覆誰能數  
君心與妾既不同  
徒向君前作歌舞  
朱萸滿宮紅實垂  
秋風裊裊生繁枝  
姑蘇臺上夕燕罷  
他人侍寢還獨歸  
白日在天光在地  
君今詎得長相棄

青樓曲二首

王昌齡

白馬金鞍從武皇  
旌旗十萬宿長楊  
樓頭小婦鳴箏坐  
遙見飛塵入建章



馳道楊花滿御溝紅妝綬綰上青樓金章紫綬千餘騎  
夫壻朝回初拜侯

同前

于漬

青樓臨大道一上一迴老所思終不來極目傷春草

中流曲

崔國輔

歸時日尚早更欲向芳洲渡口水流急迴船不自由

聖壽無疆詞十首

楊巨源

文物京華盛謳歌國步康瑤池供壽酒銀漢麗宸章雨

露涵雙闕雷霆肅萬方推仙祚遠春共聖恩長鳳宸  
臨花暖龍鑪傍日香遙知千萬歲天意奉君王

鵷鷺彤庭際軒車綺陌前九城多好色萬井半祥烟人  
醉逢堯酒鸞歌答舜弦花明御溝水春暖禁城天錫宴  
文逾盛徵歡物更妍無窮豔陽月長照太平年

雲陞臨黃道天門在碧虛大明含睿藻元氣抱宸居戈  
偃征苗後詩傳宴鎬初年華富仙苑時哲滿公車化入  
網緼大恩垂渙汗餘悠然萬方靜風俗揖華胥

玉漏飄青瑣金鋪麗紫宸雲山九門曙天地一家春瑞  
靄方呈賞暄風本配仁巖廊開鳳翼水殿壓黿身文雅  
逢明代歡娛及賤臣年年未央闕恩共物華新

垂拱乾坤正歡心品類同紫烟含北極玄澤付東風珠  
綴畱晴景金莖直曉空發生資盛德交泰讓全功間氣  
登三事祥光啟四聰遐荒似川水天外亦朝宗

代是文明晝春當燕喜時鑪烟添柳重宮漏出花遲漢  
典方寬律周官正採詩碧霄傳鳳吹紅旭在龍旂造化

應神契陽和沃聖恩無因隨百獸率舞奉丹墀

睿德符玄化芳情翊太和日輪皇鑒遠天仗聖朝多曙  
色含金榜晴光轉玉珂中宮陳廣樂元老進膚歌蓮葉  
看龜上桐花識鳳過小臣空擊壤滄海是恩波

物象朝高殿簪裾溢上京春當九衢好天向萬方明樂  
報簫韶發林看沆瀣生芙蓉丹闕暖楊柳玉樓晴閭闔  
開中禁衣裳儼太清南山同聖壽長獻鳳凰城

日上蒼龍闕香含紫禁林晴光五雲疊春色九天深賞

協元和德文垂雅頌音景雲隨御輦顯氣在宸襟永保  
無疆壽長懷不戰心聖朝多慶賜瓊樹粉牆陰

化洽生成遂功宣動植知瑞凝三秀草春入萬年枝鳳  
掖嘉言進鴈行喜氣隨仗臨丹地近衣對碧山垂渥澤  
方柔遠聰明本聽卑願同東觀事長觀漢威儀

朝元引四首

陳陶

帝燭熒煌下九天蓬萊宮曉玉鑪烟無央鸞鳳隨金母  
來賀薰風一萬年

玉殿雲開露冕旒  
下方珠翠壓龍頭  
天雞唱罷南山曙  
春色光輝十二樓

萬寓靈祥擁帝居  
東華元老薦屠蘇  
龍池遙望非烟拜  
五色瞳矐在玉壺

寶祚河宮一向清  
龜魚天篆益分明  
近臣誰獻登封草  
五嶽齊呼萬歲聲

平蕃曲三首

劉長卿

吹角報蕃營  
廻軍欲洗兵  
已教青海外  
自築漢家城

渺渺戍烟孤茫茫寒草枯隴關何用閉萬里不防胡  
絕漠大軍還平沙獨戍閒空留一片石萬古在燕山

悲陳陶

杜甫

孟冬十郡良家子血作陳陶澤中水野曠天清無戰聲  
四萬義軍同日死羣胡歸來血洗箭仍唱胡歌飲都市  
都人回面向北啼日夜更望官軍至

悲青坂

我軍青坂在東門天寒飲馬太白窟黃頭奚兒日向西

數騎彎弓敢馳突山雪河冰野蕭颼青是烽烟白人骨  
焉得附書與我軍忍待明年莫倉卒

哀江頭

少陵野老吞聲哭春日潛行曲江曲江頭宮殿鎖千門  
細柳新蒲為誰綠憶昔霓旌下南苑苑中萬物生顏色  
昭陽殿一作宮裏第一人同輦隨君侍君側輦前才人帶

弓箭白馬嚼齧黃金勒翻身向天仰射雲一箭正墜雙  
飛翼明眸皓齒今何在血污遊魂歸不得清渭東流劒



閣深去住彼此無消息人生有情淚霑臆江水江花豈  
終極黃昏胡騎塵滿城欲往城南望城北

一作望  
南北

### 哀王孫

長安城頭頭白烏夜飛延秋門上呼又向人家啄大屋  
屋底達官走避胡金鞭斷折九馬死骨肉不待同馳驅  
腰下寶玦青珊瑚可憐王孫泣路隅問之不肯道姓名  
但道困苦乞為奴已經百日竄荆棘身上無有完肌膚  
高帝子孫盡高淮龍種自與常人殊豺狼在邑龍在野

王孫善保千金軀不敢長語臨交衢且為王孫立斯須  
昨夜東風吹血腥東來橐駝滿舊都朔方健兒好身手  
昔何勇銳今何愚竊聞天子已傳位聖德北服南單于  
花門虜面請雪耻慎勿出口他人狙哀哉王孫慎勿疎  
五陵佳氣無時無

兵車行

車鑼鑼馬蕭蕭行人弓箭各在腰爺娘妻子走相送塵  
埃不見咸陽橋牽衣頓足攔道哭哭聲直上千雲霄道

傍過者問行人行人但云點行頻或從十五北防河便  
至四十西營田去時里正與裹頭歸來頭白還戍邊邊  
亭流血成海水武皇開邊意未已君不聞漢家山東二  
百州千村萬落生荆杞縱有健婦把鋤犁禾生隴畝無  
東西沉復秦州耐苦戰被驅不異犬與雞長者雖有問  
役夫敢申恨且如今年冬未休關西卒一云役夫心益  
憤如今縱得休  
還為隴  
西卒縣官急索租租稅從何出信知生男惡反是生  
女好生女猶得嫁比鄰生男埋沒隨百草君不見青海

頭古來白骨無人收  
新鬼煩冤舊鬼哭  
天陰雨溼聲啾啾

來從寶車騎

李益

束髮逢世屯懷恩抱明義  
讀書良不武學劍慙非智  
遂別魯諸生來從寶車騎  
追兵赴邊急絡馬黃金轡  
出入燕南陲由來重意氣  
自經臯蘭戰又破樓煩地  
西北護三邊東南留一尉  
時過如雲雨參差不自意  
將軍失恩澤萬事從此異  
置酒高樓上薄暮秋風起  
長戟與我歸

歸來同棄置自酌還自飲非名又非利歌出易水寒琴  
下雍門淚出逢平樂舊言在天階侍問我從軍苦自陳  
少年貴丈夫交四海從論身自致漢將不封侯蘇卿來  
遠使我終此曲此曲成不易貴人難識心何由知忌  
諱

憶長安曲二首

岑參

東望望長安正值日初出長安不可見但見長安日  
長安何處在只在馬蹄下明日歸長安為君急走馬

九曲詞三首

高適

河圖曰黃河出崑崙山東北流千里折西而行至於蒲山南流千里至於華山之陰東流千里至於栢雍北流千里至於下津河水九曲長九千里入於渤海酈道元水經注曰黃河百里一小曲千里一曲一直矣新唐書曰天寶中哥舒翰攻破吐蕃洪濟大莫等城收黃河九曲以其地置洮陽

郡適由是作九曲詞

鐵騎橫行鐵嶺頭西看邏逤取封侯  
青海只令將飲馬黃河不用更防秋

許國從來徹廟堂連年不為在疆場  
將軍天上封侯印御史臺中異姓王

萬騎爭歌楊柳春千場對舞繡麒麟  
到處盡逢歡洽事相看總是太平人

情人玉清歌

畢耀

洛陽城中有一人名玉清可憐玉清如其名善斜柯能  
獨立嬋娟花豔無人及珠為裙玉為纓臨春風吹玉笙  
悠悠滿天星萬金閣上晚妝成雲和曲中為慢聲玉梯  
不得踏搖袂兩盈盈城頭之日復何情

湘中弦二首

崔塗

烟愁雨細雲冥冥杜蘭香老三湘清故山望斷不知處  
鷓鴣隔花啼一聲

蒼山遙遙江潏潏路傍老盡無閒人王孫不見草空綠



惆悵渡頭春復春

湘弦怨

孟郊

昧者理芳草萬蘭同一鋤狂飈怒秋林曲植同一枯嘉  
木忌深蠹哲人悲巧誣靈均入迴流靳尚為良謨我願  
分衆泉清濁各異渠我願分衆巢集鸞相遠居此志諒  
難保此情竟何如湘弦少知意孤響空踟躕

湘弦曲

莊南傑

楚琴錚錚憂秋露平雲雨脚飛朝暮古磬高敲百尺樓

孤猿夜哭千丈樹雲軒碾火聲瓏瓏連山卷盡長江空  
鶯啼寂寞花枝雨鬼嘯荒郊松柏風滿堂怨咽悲相續  
具調中含古離曲繁弦響絕楚魂遙湘山水碧天山綠

促促曲

李益

促促何促促黃河九回曲嫁與棹船郎空牀將影宿不  
道君心不如石那教妾貌長如玉

促促詞

王建

促促復刺刺水中無魚山無石少年雖嫁不將歸白頭

猶著父母衣四邊田宅非所有我身不及逐雞飛出門  
若有歸死處猛虎當衢向前去百年不遺踏君門在家  
誰喚為新婦豈不見他鄰舍娘嫁來長在舅姑傍

同前

張籍

促促復促促家貧夫婦歡不足今年為人送租船去年  
捕魚在江邊家中姑老子復小自執吳綃輪稅錢家家  
桑麻滿地黑念君一身空努力乍教牛蹄團團羊角直  
君身長在應不得

樓上女兒曲


盧仝

誰家女兒樓上頭指麾婢子掛簾鉤  
林花撩亂心之愁  
卷却羅袖彈箏篴篴歷亂五六弦  
羅袖掩面啼向天  
相思弦斷情不斷  
落花紛紛心欲穿  
心欲穿憑欄干  
相憶柳條綠相思錦帳寒  
直緣感君恩愛一回顧  
使我雙淚長珊珊  
我有嬌靨待君笑  
我有嬌蛾待君掃  
鶯花爛熳君不來  
及至君來花已老  
心腸寸斷誰得知  
玉階暮歷生青草

青青水中蒲三首

韓愈

青青水中蒲，下有一雙魚。  
君今上隴去，我在與誰居。  
青青水中蒲，長在水中居。  
寄語浮萍草，相隨我不如。  
青青水中蒲，葉短不出水。  
婦人不下堂，行子在萬里。



樂府詩集卷九十一